



21 Disember 2016
21 December 2016
P.U. (A) 337

WARTA KERAJAAN PERSEKUTUAN

FEDERAL GOVERNMENT GAZETTE

PERATURAN-PERATURAN PEMBANGUNAN MINERAL (PELESENAN) 2016

MINERAL DEVELOPMENT (LICENSING) REGULATIONS 2016



DISIARKAN OLEH/
PUBLISHED BY
JABATAN PEGUAM NEGARA/
ATTORNEY GENERAL'S CHAMBERS

AKTA PEMBANGUNAN MINERAL 1994

PERATURAN-PERATURAN PEMBANGUNAN MINERAL (PELESENAN) 2016

SUSUNAN PERATURAN

Peraturan

1. Nama dan permulaan kuat kuasa
2. Tafsiran
3. Pelan pengurusan penyimpanan
4. Skim pemprosesan mineral
5. Larangan memperoleh mineral daripada sumber yang tidak sah
6. Aktiviti yang menghendakkan lesen
7. Permohonan bagi lesen
8. Pengeluaran lesen
9. Pembaharuan lesen
10. Perubahan butir-butir
11. Penggantian lesen
12. Ketidakpakaian peraturan 9, 10 dan 11
13. Kesahan lesen
14. Pematuhan syarat lesen
15. Penyerahhakan lesen
16. Pembatalan lesen
17. Mempamerkan atau menunjukkan lesen
18. Pelantikan pengurus premis
19. Kewajipan pemegang lesen atau pengurus premis
20. Penyata statistik
21. Penyenggaraan rekod operasi
22. Fi
23. Rayuan
24. Peruntukan peralihan

JADUAL

AKTA PEMBANGUNAN MINERAL 1994

PERATURAN-PERATURAN PEMBANGUNAN MINERAL (PELESENAN) 2016

PADA menjalankan kuasa yang diberikan oleh seksyen 63 Akta Pembangunan Mineral 1994 [*Akta 525*], Menteri membuat peraturan-peraturan yang berikut:

Nama dan permulaan kuat kuasa

1. (1) Peraturan-peraturan ini bolehlah dinamakan **Peraturan-Peraturan Pembangunan Mineral (Pelesenan) 2016**.

(2) Peraturan-Peraturan ini mula berkuat kuasa pada 1 Januari 2017.

Tafsiran

2. (1) Dalam Peraturan-Peraturan ini—

“pengurus premis” ertinya pengurus yang dilantik di bawah peraturan 18;

“perunding” ertinya seorang jurutera perlombongan atau sumber mineral profesional yang berdaftar dengan Lembaga Jurutera Malaysia;

“premis” ertinya mana-mana premis penyimpanan mineral atau premis pemprosesan mineral yang terletak di luar kawasan tenemen mineral.

(2) Dalam Peraturan-Peraturan ini, apa-apa sebutan mengenai mineral termasuklah sebutan mengenai bijih mineral.

Pelan pengurusan penyimpanan

3. Pelan pengurusan penyimpanan yang disebut dalam Peraturan-Peraturan ini ialah suatu pelan pengurusan yang diperakukan oleh seorang perunding yang mengandungi—

(a) butir-butir pemohon;

- (b) kelulusan pihak berkuasa berkaitan untuk menggunakan tanah bagi maksud aktiviti penyimpanan mineral;
- (c) apa-apa dokumen yang membuktikan hak untuk menggunakan tanah bagi maksud aktiviti penyimpanan mineral;
- (d) suatu pelan susun atur kawasan penyimpanan mineral berserta dengan perincian kawasan itu;
- (e) maklumat berhubung dengan langkah-langkah keselamatan yang dicadangkan untuk diambil pada masa pengendalian mineral;
- (f) maklumat berhubung dengan langkah-langkah perlindungan alam sekeliling termasuk maklumat berhubung dengan kawalan dan mitigasi pencemaran, rancangan pemantauan dan rancangan luar jangkaan, jika berkenaan;
- (g) maklumat berhubung dengan pengendalian sisa pepejal, pembuangan efluen atau pelepasan gas; dan
- (h) suatu rancangan selepas pemberhentian aktiviti penyimpanan mineral, jika berkenaan.

Skim pemprosesan mineral

4. Skim pemprosesan mineral yang disebut dalam Peraturan-Peraturan ini ialah suatu skim pemprosesan mineral yang diperakukan oleh seorang perunding yang mengandungi—

- (a) butir-butir pemohon;
- (b) kelulusan pihak berkuasa berkaitan untuk menggunakan tanah bagi maksud aktiviti pemprosesan mineral;

- (c) apa-apa dokumen yang membuktikan hak untuk menggunakan tanah bagi maksud aktiviti pemprosesan mineral;
- (d) suatu pelan susun atur premis pemprosesan mineral yang mengandungi maklumat berkaitan termasuk kawasan pemprosesan, penyimpanan stok, pembendungan hampas dan alur limpah efluen;
- (e) perincian kawasan dalam lingkungan tiga kilometer radius dari premis pemprosesan mineral termasuk semua kepentingan orang awam di kawasan itu;
- (f) kaedah pemprosesan mineral yang dicadangkan dan peralatan yang akan digunakan;
- (g) maklumat berhubung dengan kapasiti pengeluaran bulanan premis pemprosesan mineral;
- (h) maklumat berhubung dengan kaedah penyimpanan dan pengendalian bahan berbahaya, jika berkenaan;
- (i) maklumat berhubung dengan pengendalian sisa pepejal, pembuangan efluen atau pelepasan gas;
- (j) maklumat berhubung dengan langkah-langkah perlindungan alam sekeliling termasuk maklumat berhubung dengan kawalan dan mitigasi pencemaran, rancangan pemantauan dan rancangan luar jangkaan, jika berkenaan;
- (k) suatu rancangan selepas pemberhentian aktiviti pemprosesan mineral; dan
- (l) suatu rancangan pengurusan keselamatan yang mengandungi butir-butir yang berikut: